

Hasil penyelidikan jadi produk komersial

Oleh MUSTAFA KAMAL BASRI

SERI KEMBANGAN 3 Sept. - Kerajaan sedang memberi tumpuan untuk menjadikan hasil penyelidikan negara sebagai produk komersial, kata Perdana Menteri, Datuk Seri Abdullah Ahmad Badawi malam ini.

Katanya, kerajaan telah menubuhkan agensi Pembangunan yang berorientasikan perniagaan seperti Perbadanan Pembangunan Teknologi Malaysia (MTDC) untuk menjalankan usaha mempromosi hasil penyelidikan secara komersial.

Bagi mencapai matlamat itu, usaha perlu ditumpukan untuk mengenal pasti kehendak pasaran dan pengguna, katanya ketika berucap selepas menerima anugerah Sijil Felo Kehormat Akademi Sains Malaysia (ASM) di sini malam ini.

Anugerah itu telah disampaikan oleh Yang di-Pertuan Agong, Tuanku Syed Sirajuddin Tuanku Syed Putra Jamalullail.

Permaisuri Agong, Tuanku Fauziah Tengku Abdul Rashid turut berangkat pada majlis itu.

Bekas Perdana Menteri, Tun Dr. Mahathir Mohamad dan Tun Dr Siti Hasmah Mohd Ali juga hadir pada majlis itu.

Pada majlis itu juga, Prof Dr. John Sheppard Mackenzie, pakar dalam bidang penyakit berjangkit tropika dari Universiti Teknologi Curtin, Australia menerima Anugerah Kehormat Tun Dr. Mahathir Mohamad bagi Kecemerlangan Saintifik ASM.

Anugerah yang pertama kali diperkenalkan itu disampaikan oleh Yang di-Pertuan Agong dengan disaksikan oleh Dr. Mahathir.

Mackenzie menerima wang RM100,000, pingat emas dan sijil.

Dalam pada itu, Abdullah menerima anugerah Felo Kehormat ASM itu atau kepimpinan dan komitmennya dalam membangunkan sains, teknologi dan inovasi bagi menjana pengetahuan baru, mewujudkan kakayaan bagi faedah rakyat.



TUANKU Syed Sirajuddin Syed Putra Jamalullail menyampakan mock cek bernilai RM100,000 kepada Mackenzie sambil diperhatikan oleh Abdullah Ahmad Badawi dan Dr. Mahathir Mohamad di Seri Kembangan, Kuala Lumpur malam tadi.

Perdana Menteri berkata, Malaysia sudah menubuhkan banyak prasarana sains dan teknologi bagi mengurangkan jurang antara hasil penyelidikan dengan usaha untuk menjadikannya produk yang mempunyai nilai komersial.

"Malangnya semua usaha itu sama ada tidak memenuhi keperluan industri atau tidak mendapat pembiayaan yang men-

cukupi," katanya.

Menurutnya, daripada 5,232 projek Penyelidikan dan Pembangunan (R&D) yang dijalankan di bawah Rancangan Malaysia Keenam dan Ketujuh hanya 14.1 peratus dikenal pasti mempunyai nilai komersial dan 5.1 peratus mempunyai nilai komersial sepenuhnya.

Katanya, Akademi Sains Malaysia (ASM) sedang menyediakan laporan

bagi memandu kerajaan bagaimana hasil kerjasama berkesan dalam bidang penyelidikan dan inovasi dapat dikomersialkan dan memberi faedah kepada rakyat.

"Saya memberi perhatian serius kepada laporan itu dan berharap ia akan memberi pandangan dan perakuan yang berguna bagi mengurangkan jurang tersebut." katanya.